

摘藻堂四庫全書薈要

集部

欽定四庫全書

集部

元詩選初集卷二十六

詳校官候選知縣臣吳甸華



欽定四庫全書薈要卷二萬三百八十六集部

元詩選初集卷二十六 長洲 顧嗣立 編

虞集道園學古錄

燕陳公子宅贈燕學士

照大隄花間聞馬嘶城頭鼓角起相送五門西

宣和墨竹寒雀

灑墨寫琅玕深宮春晝閑蕭條數枝雪不似紇干山

上馬

眼昏身手鈍上馬怕風沙
祇好扶藜杖循籬看落花

畫雙蝶

舞罷庭花落池邊看睡鳧
無端雙蛺蝶飛上繡羅襦

捕魚圖

網罟日相從天寒澤國空
釣竿長倚樹老却渭川翁

題柯敬仲雜畫十首

北苑今仍在南宮奈老何
青山解浮動端為白雲多
雨過蒼苔石雲生野岸
泉幽懷春冉冉穉子秀娟娟

鐵石餘生色冰霜作曉妍春雷明日起何處尚龍眠
昔過篔簹谷鈎衣石角斜儼尋龍作杖拾得上天槎
黃金千瑣甲瑠玉六簾鈎雨送鴛鴦夢烟籠翡翠愁
娟娟生玉潤楚楚作金聲羽扇迎風定羊車過月明
峽口春雲重江南夜雨多水深桃葉渡風急竹枝歌
平陸蒼龍起近山生遠烟前村三萬頃明日水平田
莓苔生石路翠竹自交加不惜青鞵濕臨流踏白沙
昨夜採樵去偶逢三尺枯山人不到海不識是珊瑚

題李旣之學士湖上諸亭錄五

烟蘿境

玉女乘烟霧松間采薜蘿
飛行了無迹明月送空歌

金潭雲日

金沙灘上日潭底見雲行
祇有琴高鯉時時或作羣

漏舟

春水如天上秋潭見月中
如何列禦寇猶欲待冷風

秋水觀

湖深山影碧天淨月光空幸自無波浪蘋花謾晚風

無倪舟

三周華不注水影浸青天不上銀河去空明擊棹還

次韻竹枝歌荅袁伯長三首

沙禽東去避網羅蕩舟相逐如遠何越山青青越女白
從此勞人魂夢多

春江風濤苦欲歸東盡滄溟南斗低明年白日百花靜
憶爾琴中烏夜啼

燕姬當壚玉雪清簫中吹得鳳凰聲不及晴江轉柁鼓

洗盞船頭沙鳥鳴

揚鐵崖西湖竹枝詞載此三詩謂雖不為西湖而賦而其音節興象可以

為竹枝

之則云

木芙蓉

九月襄王宴渚宮霓旌翠羽度雲中滿汀山雨衣裳濕

宋玉愁多賦未工

水芙蓉

長洲宮沼醉西施蕩漾蘭舟不自持願奉君王千歲樂

一盤清露玉淋漓

送四川憲使

已歎玄經返墨池
復愁國史奉嚴祠
離鄉遊子歸仍晚
獨對東風惜鬢絲

曹將軍馬

高秋風起玉關西
踣鐵歸朝十萬蹄
貌得當時第一匹
昭陵風雨夜聞嘶

馬圖

昔在乾淳撫蜀師賣茶買馬濟時危鄉人啜茗同觀畫
解說前朝復有誰

王母圖

偷桃小兒癡且妍恃恩無賴更蒙憐竊翻雷電天公怒
風雨落花紅九川

黃竹遺墟白雪高空桑戴勝向晨噪茂陵多欲非仙器
枉賜金盤五色桃

竹塢沙頭鷓鴣

蛺蝶飛來石竹叢
羅襦曾試繡紋重
荷花啼鳥銀屏煖
卧看窻間唾碧茸

記夢中詩三首

祝融君紫虛
君率子廉

出海雲霞九色芒
金容滉漾水中央
向曾賜服玄洲玉
今結蕭臺五鳳章

飛步崔嵬上九宮
親題綵筆篆明虹
玉樓臨海連天碧
待子扶桑鶴出籠

失脚漁磯返棹遲
幾回石上候來期
老翁巖下諸年少

總解題詩笑鬢絲

錢舜舉折枝芙蓉

白髮多情憶劔南
秋風溪上看春酣
翦來一尺吳江水
擬比千花濯錦潭

賦故宋李文襄公植烏石渡舊隱

窈窕幽篁帶薜蘿
青春白日坐蹉跎
試詢烏石江頭水
寧有微波接汨羅

訪杜弘道長史不值道中偶成

雨浥輕塵道半乾
朝回隨處借花看
牆東千樹垂楊柳
飛絮時來近馬鞍

聽雨

屏風圍坐鬢毵毵
絳蠟搖光照莫酣
京國多年情盡改
忽聽春雨憶江南

春雲

春雲漠漠度宮城
樓雪初融水未生
行過御溝成久立
起頭枝上有流鶯

與趙子期趨閣

日出風生太液波
畫橋千尺彩船過
橋頭柳色深如許
應是偏承雨露多

玉堂讀卷雜賦次韻

待漏宮門聽鑰開
袖中進卷總賢才
奏名殿裏千花合
傳勅階前好雨來

千花覆檻柳垂絲
晝刻傳呼淑景遲
聖主自觀新進策
侍臣簪筆立多時

院中獨坐

何處他年寄此生
山中江上總關情
無端繞屋長松樹
盡把風聲作雨聲

題歐陽原功少監家柯敬仲畫

潯陽日日水生波
翠袖黃裳晚擢過
珠樹月明花婀娜
鳳毛春暖錦婆婆

紹興間臨安士人有賦曲一春長費買花錢
日醉湖邊玉驄慣識西湖路
驕嘶過沽酒樓前

紅杏香中簫鼓綠楊影裏鞦韆晚風十里麗人
天花壓鬢雲偏畫船載得春歸去餘情付湖水
湖烟明日重扶殘醉來尋陌上花鈿思陵見而
喜之恨其後疊第五句重攜殘酒酸寒改曰重
扶殘醉因歐陽原功言及此與陳衆仲尋腔度
之歌之一再董此字求書其事因書之并系以
此詩

重扶殘醉西湖上不見春風見畫船頭白故人無在者

斷隄楊柳舞青烟

八月十五日得旨先歸驛騎在門復召還草詔
十七日至桓州驛題壁

烏桓東望天無際
祇有銀蟾出海頭
不得吹簫送清夜
禁城鐘鼓度中秋

酬書巢送梭帚

積雨蒼苔路不分
松花盡日落紛紛
塵埃滿袖歸來晚
誰與柴門掃白雲

子昂畫

棠梨枝上白頭翁墨色如新最惱公直似故園花石外
銅盤和露寫東風

畫馬二首

蕭條沙苑貳師還苜蓿秋風盡日閑白髮園人曾習御
長鳴知是憶關山

號國夫人學畫眉宮門催入許先馳春風十里聞薊澤
新賜金鞍不受騎

題納涼圖

百頃芙蓉水滿隄
綺窻只在畫橋西
羊車薄莫過湖曲
驚起鴛鴦不竝棲

息齋竹

紫貂蚤解獵圖驂
一棹夷猶雪滿簷
山雨欲來春樹暗
盡將情思寫江南

題子昂春江聽雨圖

并序

越鳥巢南枝所欲得於江湖之上者甚不多也區

區不余畀觀此慨然

憶昔江湖聽雨眠
翩翩歸鴈度春前
數株古木依茅舍
老去何年踏釣船

次韻杜德常典籤秋日西山有感二首

落日龍舟山下回
寺門依舊對山開
霜凋碧樹烟生草
從此頻傷八月來

每進文章出殿遲
日華西轉萬年枝
甘泉罷幸揚雄老
滿鬢秋風不受吹

題柯敬仲畫

牽牛引蔓上棠梨，上有幽禽夜夜栖。
自有秋風動疎竹，江南落月不須啼。

題蔡端明蘓東坡墨蹟後

東坡墨蹟云天際烏雲含雨重樓前紅日

照山明嵩陽道士今何在青眼看人萬里情
此蔡君謨夢中詩也僕在錢塘一日謁陳述
古邀余飲堂前小閣中壁上小書一絕君謨
真蹟也綽約新嬌生眼底侵尋舊事上眉尖
問君別後愁多少得似春潮夜夜添又有人
和云長垂玉筍殘妝臉肯為金釵露指尖萬
斛閒愁向日盡一分真態為誰添二詩皆可
觀後詩不知誰作也杭州營籍周韶多蓄奇

茗嘗與君謨鬪勝韶又知作詩子容過杭述
古飲之韶泣求落籍子容曰可作一絕韶援
筆立成曰隴上巢空歲月驚忍看回首自梳
翎開籠若放雪衣女長念觀音般若若經韶時
有服衣白一坐嗟歎遂落籍同輩皆有詩送
之二人最善胡楚云淡妝輕素鶴翎紅移入
朱闌便不同應笑西園舊桃李強勻顏色待
春風龍靚云桃花流水本無塵一落人間幾
度春解珮暫酬交甫意濯纓還
見武陵人固知杭人多慧也

祇今誰是錢塘守頗解湖中宿畫船曉起鬪茶龍井上

花開陌上載嬋娟

白樂天蔡君謨陳述
古蘇子瞻皆杭守也

老却眉山長帽翁茶烟輕颺鬢絲風錦囊舊賜龍團在

誰為分泉落月中

三生石上舊精魂解后相逢莫重論縱有繡囊留別恨
已無明鏡著啼痕

能言學得妙蓮華贏得春風對客誇乞食衲衣渾未老

為題靈塔向金沙

丹丘柯敬仲多蓄晉魏法書至宋人書殆百十函隨以與人弗留也他日

獨見此軸在几格間甚怪之及取觀則吾坡翁書蔡君謨夢中詩及守居閣中舊題也第三詩以為不知何人作其軒轅彌明之流與陳太守放營妓三詩亦辱翁翰墨流傳至今亦有緣耶卷後多佳紙敬仲求集作詩識其後賦此四首是日試郭岷墨但目疾轉深不復能作字又知年歲後雖若此者亦尚能作否臨楮慨然至順

辛未二月望日
蜀人虞集書

題著色山圖

巫山空翠濕人衣
玉笛凌虛韻轉微
宋玉多情今老矣
閑雲閑雨是耶非

題東坡帖

東坡先生書少陵翁負薪行
筆力與詞氣同一高
古憶在江上聞舟人竹枝
一首謾識于此

魚復浦前春水生
負薪渡江初月明
憑郎莫下巫峽去

楚王宮殿在專城

此詩亦見鐵崖西湖竹枝詞

臘日偶題

舊時燕子尾毵毵
重覓新巢冷未堪
為報道人歸去也
杏花春雨在江南

題扇與周幹臣

玉疊松花蜜餅香
龍珠星顆露盤涼
遙知環碧樓中坐
翠竹蒼松夏日長

題周怡臨韓幹明皇出遊圖

以下應制錄

開元盛事何人畫
玉冠芙蓉御天馬
從官騎步各有持
移仗華清意閑暇
宮袍如錦照青春
詔許傳看思古人
不知身在瀛洲上
親奉圖書侍紫宸

徽宗畫梨花青禽圖

宿雨初收禁林寂
玉斧臨窻看春色
蒺藜沙上煖塵飛
何處人間作寒食

趙千里小景

前代王孫不好武
拈筆幽窻寫汀渚
殘雲野水三百年

依舊松筠濕春雨

韓幹馬

開元沙苑疾藜秋韓幹新圖總不收
天廐真龍竒骨在故知臣甫負驂騮

曹霸下槽馬

櫪下長年飽豆芻誰通馬語識踟蹰
主恩深重知何報或者東封駕鼓車

滕昌祐懷香睡鷺圖

蒼鷺惜毛羽宛宛卧春雨雨餘日照沙上有懷香花懷
香不自獻夢到金鷺殿殿池多躍魚君王方草書

竹林七賢圖

以下歸田藁

瞻彼脩竹下臨清流文石偃隄華松蔭丘植表界壤翦
茅宅幽梁度高巘臺隱中洲方牀讀書異宮同休咏歌
相聞觴豆相求或詩名藥或釣游儵課藝嘉植坐思遠
遊濯纓微波看雲良疇逸而不放儼而自脩泰哉沮溺
邈乎巢由按圖以觀永宜春秋孰若五君遺其故儔糟

粕塵世高蹤莊周我懷古人逝而違憂安得揮絃以招
湛浮

題汪華玉所藏蘭亭圖

衡茅負晴旭有客至我門共披會稽圖山水盛繽紛衆
賢坐水次飛觴汎沄沄夷曠各有趣高閑知右軍幽情
付後覽陳迹感前欣悠悠千載來不異更旦昏探穴問
神禹望海悲秦君逝者皆如斯死生固奚云所以鼓瑟
人思從童冠羣春服沂新浴歸歟聊永言撫卷不知老

遐思在茲文東南極積水日莫多浮雲

玉隆留題

仙真治茲山重阜隱延廣冲奧元氣會運至法靈響與
世作司命神宇廓弘敞及門春雨來玄感副夙仰摩挲
晉時樹託身何蕭爽千載抱微息日月共來往欲為黃
髮期日待紫芝長上天垂光彩月出江海上故人不可
待惆悵理歸鞅

記夢

夢行衡廬間千仞過蒼壁崇高仰神明深廣下不測雲
雨蓄盤礴時至如欲出網緼尚回旋揮霍忽奔逸物怪
匿巖穴雙若俟霹靂黑波汎高樹木葉走崩石升身登
玄間縱觀龍變迹俯視九州野草木有輝澤乃在風雨
外手畫素三尺揮毫極動盪落墨更沈鬱圖成示坐人
共笑不可得顧瞻以踟躕恍惚增歎息因之命肩輿出
門聊有適大術何舒舒白鶴從數客畧經幽澗濱便上
青松側憑高望遠水雙景蕩虛碧拂石共客坐芳草藉

尻膝忽然聞鐘聲睡覺北窻席

道園外祖楊文仲守衡州井齋依之時未有子

文仲為禱於南岳遂生道園文仲夢一牙兵持刺入曰南岳真人來見既覺聞兒啼聲因命小字曰衡道園自言少時嘗夢遊南岳歷覽其奇勝頗能記憶焉

次韻陳溪山梭履二首

解鳥還上方歸山據枯槁禁足結僧夏陳編謝探討
隱几或過晝凝塵遂忘掃行庭不見人誰或踐生草實由
筋力衰無復馳走好前年當此時嚴召出城早追度龍
門水賜見沙領道鼎湖忽踰年始克罷趨造感君素履

詠幽貞可長保
番番茹芝人
長歌豈知老

六月乃屢雨
良田不憂槁
獨念桂林戍
觸熱赴南討
道路備攘掠
所過淨於掃
縛人夜送軍
吏卒何草草
蠻獠亦人類
義利啓戎好
尋原可制亂
機要貴及早
夜來送者還
頗言暘橫道
諸軍四面集
同月約皆造
誰為飢渴謀
性命安可保
藜藿雖滿盤
對之令人老

和陳溪山韻

幽人慎素履
古道思獨往
瞋目登高臺
浮雲不足上
丹

砂煉仙骨沆瀣濯神爽遠懷澄江靜耿若孤月朗河漢
自傾注山川邈游想歛迹倦飛翼歸耕故時壤好風從
東來空谷感遺響詔書薦遺逸郡府屬高仰聊持東湖
水往助敬亭賞

楚石琛藏主自蔣山歸却欲就叢林閱藏同舟
清江之上賦此贈之

手攜北山雲却上西江水月明洲渚生葉落風不起虛
舟不移棹寒波釣金鯉銀河轉碧落北斗去天咫龍吟

匣中劔虎躍弦上矢殺機誰敢當吹毛豈輕試貝葉啟
千函木榻脫雙履惟應勝壁觀悠悠度年歲

題蒙菴為黃石谷賦

東南有高丘下臨萬家邑汪洋決春潤沃衍盛秋入羣
山若浪波起伏翠重襲靈運好奇險高平罕相及幽人
園綺間周覽度原隰隨山導清泉積石拾層級結菴以
蒙名果行信所執良時一來遊朔月九交十門當星斗
高隴卧風雨濕一川燈火歸賓從雜車笠登高媿能賦

騰身竦山立

平江開元雪窻光禪師訪子臨川山中其歸也
子與賓客用一雨六月涼中宵大江滿分韻送
之不足子為繼之而子分得一字

積雪何處高蜀山最崱峿海東極孤絕目送斷鴻一徘徊
杪擺樹宴坐但空室園果墮宿雨當晝從定出八月
露水繁石鉢滿華蜜相會豈無因分牀便深密

秋山行旅圖

春夏農務急新涼事征遊飯糗既盈橐治絲亦催裘升
高踐白石降觀索輕舟試問將何之結客趨神州珠光
照連乘寶劔珊瑚鈎乘馬垂苜蓿縱目上高丘策名羽
林郎談笑覓封侯太行何崔嵬日莫摧回轉古木多悲
風長途使人愁羸驂見木末足倦霜雪稠谷口何人耕
禾麻正盈疇出門不及里酒饌相綢繆壯者酣以歌期
頤醉而休安知萬里事有此千歲憂

次韻太朴良友對何仙舟讀書山中見懷之作

得謝荷休澤消搖在巖阿結廬庇風雨樊圃寡藤蘿塞
坐古人書日夕猶詠歌追念少壯日玩愒亦已多兢兢
事補塞奈此遲莫何美人百里內邈若隔山河興懷貽
好音緼藉三春花報言慎芳歲卷石崇巍我

劉忠肅公之四世孫中書舍人諱震孫之曾孫
益之題其居曰雲松巢予家與劉氏累世之契
故為書忠肅公文集之首詩三篇并賦此與之
丞相昔遊泰山頂天風浩浩春晝永玉檢微茫不可求

但覺靈霞熟丹鼎白日人間如水流前代衣冠成古丘
悠悠憂患何足計直道千年橫素秋徂徠之松數千尺
東連海上莫烟碧中書偉人如玉立每向南風望東北
濁世公子何翩翩却憶匡廬還謫仙芙蓉出水耀初日
五色光新天為妍我今僑居廬阜側西視我眉歸未得
豈無雲錦晚相娛月落終懷雪山白森森喬木魯東家
河間禮樂更光華忽忘先世舊遊處吾秣爾馬膏其車

空山歌

高空之山聶公宅雅川作圖纔數尺秋天薄雲千仞表

春雨喬林百年物憶昔侍郎鎮成都將佐盈庭賓客趨

錦官城外笳鼓發駟馬橋邊高蓋車先廬舊在小東郭

丞相祠前同寂寞嚴公同訪杜陵家退之亦到淮西幕

我眉嵯峨久不歸江水娛人秋日暉坐看蓬萊變桑海

自古南城天下稀公子親迎陳氏館我初至撫猶弱冠

看君揮翰甚風流豈想重逢鬢毛換君言中間一再來

數見先公胸次開鶯花風雨必求友水竹園林持酒杯

嗟予晚歲始能退寧有文章驚海內平生不受簡書畏
故家高致君應最圖中山色積翠濃雖欲舍子將焉從
蜀人相如最能賦行倚山木歌高空

為變玄圃題鼇溪春曉圖

芙蓉山陽萬家邑石額戴轍縈紆入溪水西行夜雨深
連邨桑柘春雲濕昔因荒迴少官府日莫狐兔作人立
自從置縣二百年稍有衣冠更俗習讀書進士比舍聞
潤屋黃金亦家給山中白日浮雲多負乘因仍足車笠

變侯世胄國勲舊射策君門恥沿襲朱衣作監列星宿
遠人豈意高軒及援琴不鼓書牒稀彈鋏無魚賓客集
繡衣使者停車見黃堂大夫下牀揖登高望遠送飛鴻
攬轡駸駸度原隰人言桐鄉人愛我我愛桐鄉重於邑
畫圖千疊山木稠芟舍蕭條莫忘葺

題馬竹所畫

霜清木落江海空一棹歸來何處翁雙松千歲如鐵石
為爾回薄旋天風憶昔神龍劍所化夕卧滄波弄明月

望中冉冉雲氣生
直接銀河上瓊闕

霍元鎮規模董北苑
米南宮父子寫山水雲物
殊有標致見示春江捕魚圖
遂賦此

春江聚網萬魚急
漁人相謹魚相泣
負薪深山何處樵
利害相乘不相及
海鷗冥冥秋影微
黃葉江南一棹歸
人間得失兩無迹
不廢山水含清暉

同開先南楚悅禪師
觀息齋畫竹卷於崇仁普
安寺煜公之禪室
蓋煜之師一初本公所藏也

因記延祐甲寅息齋奉詔寫嘉熙殿壁南楚與
之同寓慶壽寺時予同為太常博士俯仰之間
已為陳迹乃題其後云

嘉熙殿裏春日長集賢奉詔寫蒼筤邇來二十有五載
飄零殘墨到江鄉匡廬高人昔同住每見揮毫鳳鸞翥
木枯石爛是何年脩竹森森長春雨

題邨田樂圖

尺素自是高唐物瑩如秋水宜設色何人畫此畎畝間

二三老人若相識茅屋蕭條古樹下農務未殷牛在野
或憐鸚鵡脫籠繫或弄獼猴笑真假老翁政自如兒嬉
高髻襁負相扶持古時粉社祀田祖移饌高亭隨所宜
抱瓮初來未貯酒亦有生鶯宛延首邛優競攜樂具至
犬怪雞驚兒拍手拄杖出門欣見賓雜華滿庭生好春
歲時無事得如此擊壤何必非堯民騎驢過橋殊矍鑠
攜具荒陂來赴約定知張果千歲人遊戲人間共杯酌

柳塘野鴨

江南水退秋光淺風柳參差萬絲捲鴛鴦在梁鳧在渚
蕩蕩扁舟去家遠千艘轉海古長策白粲連江動秋色
斷蒲折葦野水闊爛爛明星且將弋翠盤擎露夜深寒
玉色亭亭落月殘太液池頭黃鵠下夢中曾見畫中看

江貫道江山平遠圖

江參去世二百年翰墨零落多無傳人間幾人寫山水
誰能意在揮毫前昨見石林舊家物春雷疊嶂初破墨
我和葉詩頗豪放三者相望都笑兀險危易好平遠難

如此千里數尺間高雲舒卷非散地麗日照耀皆名山
我持美脯酒一斗墨汁盈盤可濡首江生精神作此山
向山呼生當至否高秋銀漢天無雲惟中冷然來夜分
黃茅嶺頭華蓋頂畫我獨訪浮丘君

為汪華玉題所藏長江萬鴉圖

雲巢幽人愛江渚抽思揮毫寫橫素波瀾不驚潦水盡
秋氣晶明絕烟霧征帆去棹不相襲岸曲洲旋總堪賦
孤邨城市僅如蟻百丈牽江直如縷蕭蕭木葉洞庭波

歷歷晴川漢陽樹蒹葭宿鴈天欲霜叢葦寒鴉日云暮
就中樓觀何王宮想見華年貯歌舞丹青倒景駭靈怪
粉黛含情怨幽阻青春遊子憺忘歸白日冷風帳中語
人間遺迹何足留最惜精思墮塵土郭熙平遠無散地
小米蒼茫託天趣銛鋒鋌戟不破墨刻畫晶瑩昔誰苦
渤海細書藝文草精絕戈波絕回互南唐後主萬鴉圖
點點晨光動毛羽昔年曾見今日昏雖復逢之亦難覩
汪侯此卷出故家相視摩挲極愁予香奩犀軸見者稀

謾錄餘情示來者

題漁邨圖

黃葉江南何處邨
漁翁三兩坐槐根
隔谿相就一烟棹
老嫗具炊雙瓦盆
霜前漁官未竭澤
蟹中抱黃鯉
肪白已烹甘瓠當晨餐
更擷寒蔬共萑席
垂竿何人無意來
晚風落葉何毳毳
了無得失動微念
況有興亡生遠哀
憶昔采芝有園綺
猶被留侯迫之起
莫將名姓落人間
隨此橫圖卷秋水

題韓幹畫馬

韓生觀馬十二閑時寫一二傳人間坡翁嘗來伯時宅
見此遺迹開衰顏前行如雲塵不動後者追風絕飛鞚
昔人能事已可能始覺賞識非虛諷昔觀祕府韓絕少
得見龍眠已驚倒使人讀詩如見畫人中豈復生坡老
五雲之中天上竒代產名駒天子騎神明尚令後古見
莫歎韓生非畫師

題秦虢二夫人承召遊華清宮圖

貴人竝鞚如輕鴻承恩馳入華清宮道途先不止行客
策蹇奔趨烏帽風奚囊墮地何足拾豈有篇章浪相及
畫史當時妙墨傳光彩流動狂情急君不見白頭拾遺
徒步歸明眸皓齒事皆非朝天泥滑袖封事高閣雨餘
宮漏稀

玉隆宮所藏宋乾道宸翰雲壑二字

昔者雲歸壑天章自九重日華常映鳳山氣盡成龍俯
仰遺陳迹高深儼德容飄然化春雨結想在高松

寄三衢守馬九皋

聞道三衢守年豐郡事稀詩成花覆帽酒列錦成圍鶴
髮明春雪貂裘對夕暉扁舟應載客閑聽洞簫歸

寄題汪道士草亭

飛白妙娉婷新題照草亭仙遺相鶴法客借換鶯經霧
雨歸懸黍風雲護伏苓遙知春晝永深坐養黃庭

聞鴈

樓近煖雲濕夜深聞鴈低聲音燈外盡羽翮月邊迷冉

再白榆上悠悠黃竹西應逢穆王駿春草一長嘶

錢舜舉畫

一樹花如雪清明客未歸坐看黃鳥竝夢作綵雲飛翠
袖寒猶薄羊車過絕稀相如能作賦月下卷春衣

山水圖

汎舟桑落浦望見香爐峯野水常欹樹山雲不礙鐘桃
源攜客覓松徑與僧逢為託荆關輩添子九節筇

題馬竹所畫

老樹依江岸歸舟傍釣竿
水花看晚淨風葉識天寒
鴈字來千里魚羹付一餐
遠山青可隱日下是長安

送客北門晨登山木閣

晨登山木閣零雨煖於春
溪水解留客梅花偏照人
秫香知酒熟市遠覺民淳
此地堪娛老惟愁度水頻

仙遊道士余岫雲為從珠谿
余隱士求得華山下黃茅岡
一曲規作丹室喜而賦之不覺
五首

華山東下有茅岡云是毛公舊
隱場清露尚餘丹滿白

白雲今許草為堂冬憑野燒開畚隴春託山雷淨石牀
從此便為千載計洞天先拜紫玄章

茅岡地主古醇儒乞我岡頭作隱居嶺上閑雲從管領
澗中流水聽開除刀耕火種從茲始雨笠風瓢便有餘
自古詩人多會合浮丘毛氏不愁予

石人屹立古仙壇雙澗交流拱一盤臨水種松須匝匝
就中作室要寬安洞經即日脩真訣玉白逢春浴舊丹
却恐山中添故事題詩莫與世傳看

仙游辦得茅千束華蓋須分屋數間
微咏玉經忘我老
謾調金鼎勝於閑龍雷變化從舒卷
鶴露清寒自往還
何似綺園諸老者採芝初不離南山

茅岡初割一溪雲玄契華陽舊隱文
謁簡自題香案吏
封章先報大茅君種成和露桃千樹
借與摩霄鶴數羣
便是宸清真洞府不煩夢想託紛紜

撫郡天寧明極覺講主陪敬齋監郡奉祠華蓋
持有高咏三讀敬歎僕偶共清游輒復次韻衰

退不工聊資笑粲

三峰宮殿接新橋十月長齋陟翠堯朝步仍垂蒼玉佩
登歌還引紫瓊簫千枝絳蠟連虹貫五色香雲向日飄
賴有高人陪後乘輕清詩句似參寥

秋日同朋游北塔山

歸田多病故人疎好客相逢樂有餘老去深杯那解飲
詩成大字尚能書門生去上青驄馬道士歸騎赤鯉魚
如此餘閑多樂事誰能七十始懸車

送易用昭

詩成長是倩人書最愛東家織翠裾
遠樹斷雲春雨外華星明月晚涼初
滿窗柿葉題都徧短帽梅花畫不如
莫向墨池成久別鴛羣還欲謝宗虛

集自郡城歸溪山翁寄詩并和申字韻垂教依
韻再呈殊愧遲拙

莫春長日雨兼風買得江船未及東
出郭故人邀杜老輟耕田父訝龐公
謾從修禊忘溪曲何用安車徧洛中

旦起紫芝行復長詠歸先與謝崆峒

待客花陰午過申茶香榆火一時新
干竿嫩綠搖輕暑
數萼餘紅墜晚春坐憶雲林行道迹
夢游仙島意生身
連根分種如冰雪來向清池對玉真

己卯臘八日雪為魏伯亮賦

官橋柳外雪飛綿客舍尊前急管絃
僧粥曉分驚臘日
獵圍晨出憶殘年白頭長與青山對
華屋誰為翠黛憐
惟有寒梅能老大獨將清艷向江天

某與胡伯友書問疏濶稍久因楚石藏主待謁
翹仰高誼賦寄此詩

喬木千章萬壑秋使君清興在危樓
星沈夜水神魚化
霜落寒汀宿鴈留
紅袖烏絲酣楚客
畫屏銀燭看吳鉤
不知肯著枯藤杖
采采芙蓉涉遠洲

贈楚石藏主謁饒心道六有先生

不識南塘第幾橋
翠樓華屋上岩堯
古文獨許揚雄識
幽興誰為杜甫邀
伐木春聲生澗谷
涉江秋影蕩蘭苕

散花如雨攜雙履解與高人話寂寥

縉山張君榮字仲華來丞撫之崇仁歷兩政六年心平氣順上下相安如一日雖有遠役重勞亦無闕事甚可稱也予之閑居相愛如故舊每懷扈從東道往來縉山道中見其風土之勝民俗之美未嘗不談道以為樂於其受代調官京師因記之以詩而與之別明年進秩南來觀舊治父老兒童相迎於東門之外又當歌此以為

一笑之歡也

昔從時巡出縉山翠畦綠樹畫圖間驅車百折龍門險
載筆千峰虎帳閑麥粉勸嘗銀縷熟梁炊持獻玉漿還
道旁父老應常好為說鄉風一破顏

送撫郡經歷海朝宗調官

館閣論思拜命新風雲近接屬車塵受釐宣室多清夜
奏賦甘泉是莫春雨過落花行處少日移高樹坐來頻
知君此日行吟思驄馬封章又避人

東坡墨竹

扁舟憶上浣花溪
風雨橫江萬竹低
石室歸來秋似水
峨眉相對醉如泥
春雷翻石蛟龍起
夕照穿林鳥雀栖
二老何年重會面
為揮濃墨寫淒迷

白雲閒上人度夏

白雲長傍太湖飛
忽向西江度釣磯
彭澤小龍邀共飯
潮陽遷客憶留衣
筍因春雨朝朝喫
橘待秋霜顆顆肥
我自本名無所住
經函松下共柴扉

荅甘允從寄海東白紵

海國練衣雪色明，寄將千里見高情。
著隨野鶴渾相稱，行近沙鷗亦不驚。
江露滿船歌醉起，爐烟攜袖憶詩成。
秋風遊子偏愁予，誰采芙蓉共晚晴。

孫宰金碧山水

昔代香山避暑宮，中天積翠立芙蓉。
雲生金水三春柳，露滴銀牀五粒松。
飛瀑橋長通窈窕，斷堤人倦立從容。
舊時行處今看畫，烟雨樓臺晚更濃。

甲戌四月十七日至臨川冲雲寺祝聖壽齋罷
為賦此詩

郭西寺門雙石頭水檻相對林塘幽
白花過雨落松暝
黃鳥隔溪鳴
麥秋衰朽虛蒙宣室問
淹遲實愛小山留
為貪佛日同僧話
滿袖天香念舊游

蜀人鐫夢良效楊補之掀篷圖

錦屏山下花如錦
却愛清江野水邊
放筆豈能無直幹
掀篷方欲鬪清妍
最憐半面歌歌扇
更笑輕身障舞筵

君看上林千樹雪繁枝何處獨娟娟

荅錢翼之

吳郡名書盛有唐流傳風致到錢郎閉門三月梨花雨
徧寫千林柿葉霜客看舊題驚歲月僧將新句度江鄉
莫愁茅舍淹留久秋菊春蘭各自芳

柯敬仲畫古木疎篁

不見丹丘四五年幽篁古木更蒼然薰葭霜露風連海
翡翠蘭苔月在川憶昔畫圖天上作每題詩句世間傳

前邨深雪誰高卧亦有晴虹貫夜船

李伯宗錄詩

老去逢春祇謾吟敢煩綵筆為追尋
玉堂天上成塵夢茅舍山中稱野心
萬里雲霄歸鳥盡孤村風雨落花深
文章傳世知何用空使高情慨古今

閩憲克莊以故舊託文公五世孫明仲遠徵鄙
文老退遺棄散逸荷宗伯用昭止善浩淵子勛
至善及余表姪孫陳誼子兄子豐仲弟之壻賈

熙用昭之從子大年等十餘人寒冬連旬日夜錄之得五十卷亦已勞矣賦此為謝

老去斯文付寂寥
寒枝枯甲一遺蜩
虛言自歎真何補
好友相求不憚遙
敗篋塵埃煩數子
破窗燈火每連宵
書成明日尋梅去
共看春風轉斗杓

題汪華玉子昂蘭石二首

海內出珊瑚
枝撐碧月孤
鮫人拾翠羽
泣露得明珠
參差不可吹
紉佩寄遠道
遂令如石心
歲晚永相好

春妍帶雪圖

玉茗深宮裏春妍帶雪殘
可憐五色羽相竝不知寒
題饒世英所藏錢舜舉四季花木

海棠

睡起多情思依稀見太真
一枝紅淚濕似憶故宮春

黃蜀葵

花萼立清晨鶯黃向日新
金杯承玉露偏醉蜀鄉人

芙蓉

丹霞覆苑洲公子夜來遊終宴清露冷折花登彩舟

家茶

萬木老空山花開綠萼間素妝風雪裏不作少年顏

題饒世英所藏孤鶴圖

海風吹月憶危巢清夜梳翎雪墮坳仙容不知猶是畫
每聽長唳向松梢

贈朱萬初二首

珥貂鳴珮入明光新墨初成進御牀草野小臣春夢短

猶懷染翰侍君王

天歷己巳天下大定中外又安天子始作奎章之閣於宮廷之西日親御

翰墨時榮公存初康里公子山皆近侍閣下以朱萬初所製墨進大稱旨得祿食藝文之館其名藉甚邈在草

野豈勝千古之思乎

延閣晨趨接佩聲又紆朱紱向江城丹心要似東陽水

釀作官壺徹底清

朱萬初以藝文直長以年勞恩賞出佐帥幕南海轉丞東陽東陽文物之

邑俗第以名酒歸之豈其山川之望哉韓文公譏丞不負余余負丞今丞凡邑之風俗教命刑獄科賦無不得言言之當無不可行存乎其人而已萬初勉之

雪後偶成

曉來殘雪在陂陀，遠似羊羣或似鷺。
憶踏春泥看柳色，駝裘貂帽渡冰河。

自贊題白雲求陳可復所寫像

歸來江上一身輕，野服初成拄杖行。
祇好白雲相伴住，天台廬阜聽松聲。

子昂竹

憶昔吳興寫竹枝，滿堂賓客動秋思。
諸公老去風流盡，相對茶烟颯鬢絲。

八駿圖

瑤池積雪與天平西極空聞八駿名玉殿重來人世換
蕭蕭苜宿漢宮城

中秋前偶賦四首

一室蕭然絕敵虧桂香初發自先知已無熱惱仍無夢
坐到空林月落時

空林月落大如盤雞犬無聲曉氣寒童子擬謀朝一食
玉杯盛得露漙漙

一杯濃露滑如飴
灌溉清涼可療飢
畢力石田嗟已晚
空山何處采靈芝

采芝不覺過前山
偶荅樵歌莫却還
人影自行殘照外
雨雲先入翠微間

次韻荅魯子暈參政二首

海風吹雨散晨曦
紈扇高堂兩鬢絲
想見東南賓客盛
臨江醜酒看潮時

病鶴前年下玉京
空巢聊寄一毛輕
白雲千載悠悠外

自照寒溪野水清

玉龍圖

貝闕澄澄海月生
水晶簾影接空明
鮫綃翦得霓裳就
却擁冰髯上太清

贈閒白雲

白雲東去又經春
每想飛鴻到水濱
幾箇遮山松樹子
憑君灑雨洗埃塵

無題

貝闕珠宮夜不眠
露華浩浩月娟娟
不應又作人間夢
窈窕吹簫度碧烟

聞機杼

唧啞機杼隔林幽
夢覺江湖憶舊遊
滿地月明涼似水
數聲柔櫓過揚州

溪橋踏雪

萬竹孤亭積雪明
衝寒先到寄高情
過橋不是尋常客
共聽空山裂帛聲

賦范德機詩後

玉堂妙筆交游盡
投老江南隔死生
最憶崖州相憶處
華星孤月海波清

送程以文兼簡揭曼碩

故人不肯宿山家
半夜驅車踏月華
寄語旁人休大笑
詩成端的向誰誇

至正改元辛巳寒食日示弟及諸子姪

江山信美非吾土
飄泊棲遲近百年
山舍墓田同水曲

不堪夢覺聽啼鵲

癸酉歲晚留上方觀三首

燈前自了讀殘經
風入疎簾月入櫺
坐到夜深誰是伴
數枝梅萼一銅瓶

偶行幽徑豈尋春
忽見叢蘭紫茁新
幸自林深可終日
莫將香引路行人

山中積雪到簷端
獨對篝燈坐夜闌
不是梅花心似鐵
如何禁得許多寒

田舍

晨昏車馬亂雲烟花下
追遊亦偶然百舌無聲春亦去
蕭蕭田舍日高眠

別變玄圃後重寄

郭西山路有寒梅想見臨行首
重回夜聽雨聲知水長
滿船明月幾時開

古檜

根到深泉石作身
踈踈香葉不知春
海波不動天風遠

千歲寒蛟作老人

學古錄公手自編定好事者別輯公詩曰翰林珠玉其從孫堪廣為蒐訪

得古律詩七百四十餘篇曰道園遺藁以補前藁之所未備

萬戶張公廟堂詩

并序

以下遺藁

大德辛丑昭勇大將軍河南征行萬戶鎮通州張公以其兵從征緬死之通人作廟以祀公三十年間朝之公卿大夫士能為文章者莫不為之有所製作泰定丁卯公子御史亦俾予賦之集以為征緬事始末在朝諸君子則知之矣通州僻在江海

之際其人何自知之況久遠乎且不著夫狂夫首
禍之故成宗皇帝聖明卒致其罪則公所以不肯
墮其構陷必甲冑以死之意亦終不白於通人之
將來也故稍原其始而道之庶其有考也詩曰

於赫世皇並用豪傑一定宇內橐厥戈甲既久既安成
宗繼之祖功莫加道在守持狂夫興謀以動相國曰昔
祖宗咸尚戰克萬方悉來史皆前能我獨無名曷稱繼
承蓋彼西南翳叢負固聚落八百各統女婦人強善驕

馬具競豪豢豕于牢黃金飾槽取而有之富可足用赫
乎功多以世智勇相臣以聞天子曰嘻有是言哉汝其
試之狂謀既售諫言不入既賦軍實弓鉞仍戢餽饟啓
行萬里騷然飢危蹈毒未戰已捐番番名將天子爪士
鎮于江許天子所使狂夫忌之承制驅之詎思國謀徒
逞厥私將軍慨言死我臣職可陷者身不陷吾直見制
鄙庸豈我名兇心知無還况冀立功與其矯誣死彼狂
手孰與奮擊不喪吾守孤旅轉戰身入不回殺僇既多

身卒死之三軍失聲萬士喪氣孰明公心君門萬重裏
草東歸遙遙江壩部曲候迎悲風旆纏民懷其忠士感
其義虎奮鷹揚如見其至卜廟得吉東望際海神來安
之有永無壞狂夫辱國天子震怒立呼狂豎斬以大斧
狂罪則誅死事奈何褒封哀榮百世不磨豈惟不磨元
嗣御史既有兄弟又多孫子奕奕勲門秩秩良材天之
報忠豈有涯哉

金人出塞圖

海風吹沙如捲濤高為陴磧深為壕築壘其上嚴周遭
名王專居氣振豪肉食湏飲田為遨八月草白風颼颼
馬食草實輕骨毛加弦試弓復置橐今日不樂心怪怪
什什伍伍呼其曹銀黃兔鶻明繡袍鷓鴣小管隨鳴靴
背孤向虛出北岸海東之鷲王不驕錦鞬金鏃紅絨條
按習久蓄思一超是時晶清天翳絕駕鷲東來雲帖帖
去地萬仞天一瞥離婁屬望目力竭微如聞音鷲一掣
東身直上不回折遂使孤飛一片雪頃刻平蕪灑毛血

爭誇得雋頓足悅挂兔縣狼何足說旌旗先歸向城闕
落日悲風起蕭屑烟塵滿城鼓微咽大酋要王具甘歎
王亦欣然沃焦熱闕支出迎騎小驥琵琶兩姬紅顴頰
歌舞迭進醉燭滅穹廬斜轉矍逾月

題花鳥圖

一作吳中女子畫花鳥歌

吳中女兒顏色好洗面看花花為俏調朱弄粉不自施
寫作窗間雪衣鳥綠窗沈沈春晝遲半生心事花鳥知
花殘鳥去人不歸細雨梅酸愁畫眉

此詩元音乾坤清氣俱作虞集體要

作揭

篠斯

次韻馬伯庸少監四首

仍歲從巡幸山川識重臨講幃來濟濟馳道止駸駸五
月衣裘薄諸生坐席深歸耕何待老莫問二疏金
移蹕宮城曙烟花繞閣重來王俱屬籍稱使不傳烽賜
席還親問囊書更手封恐煩宣室召眡日轉蒼龍
臣甫多愁思長歌拜杜鵑鑿崖通閣道積水放樓船惆
悵霜橫野棲遲雪滿顛經行看宿草碧色自年年

太平知永日漸老惜芳晨論說慚孤學推揚負相臣退
思常感慨拜賜每逡巡郊藪多閑地餘生託鳳麟

奉別阿魯灰東泉學士遊甌越

憶昔同經幄春明下玉除挂冠俄去國連舸總盛書筍
脯嘗紅稻粳羹斫白魚莫言江海遠咫尺玉堂廬

題秋山圖

峰迴留深隱天清襲素袍棲身斷人蹟游目送鴻毛樹
挂栖厓鷲藤懸飲子孫龍眠石澗冷虎撼樹根牢木客

吟時共山樵奕處遭浮雲過水盡孤月挾霜高羽使來
三島胎仙舞九皋左招玉斧飲右攬赤松邀空色收寥
廓虛聲起繹騷彈琴遺古散載酒棹輕舫遂向圖中見
誰能世外逃乘槎幾月一作日至一泛九秋濤

送朱生南歸

一作送
朱仁卿

喜一作羨子南歸盱水上經過為我問臨川幾家橘柚霜

垂屋何處蕙葭月滿船應有交游憐遠道試從父老說
豐年寒機早晚成春服一一平安報日邊

歸蜀

我到成都住五日駟馬橋下春水生過江相送荷主意
還鄉不留非我情鷓鴣輕筏下溪足鸚鵡小窗呼客名
賴得郫筒酒易醉夜深衝雨漢州城

自仁壽迴成都

還鄉思速去鄉遲王事相縻敢後期里父留看題壁字
山僧打送捨田碑胡桃筇竹南方要盧橘枇杷上國知
此日君親俱在望徘徊三顧欲何之

送韓伯高僉憲浙西

正月樓船過大江，海風吹雨灑船窗。
雲消虹蜺橫山閣，潮落黿鼉避石矸。
闕下諫書誰第一，濟南名士舊無雙。
湖陰暑退多魚鳥，應勝愁吟對怒瀧。

寄福建僉憲馬叔惠

荔子枝頭火齊紅，高堂紈扇坐薰風。
湘筠簟冷魚波合，海柏梁深燕雨通。
絡緯豈知秋袂薄，麋麋長憶曉餐同。
禁城來看花如錦，誰道清霜解惱公。

端午節飲客與趙伯高

龍沙冰井夏初融
簪筆長隨避暑宮
蠟燭烟輕留賈誼
銅盤露冷賜揚雄
南邨久病思求艾
北客多情問轉蓬
忽聽滿船歌白苧
翻疑昔夢倚春鴻

周昉畫美人圖

島上雲生日轉欄
海風吹面暮寒尖
春明玉色遺鄉澤
夜定珠光入鏡奩
織得鴛鴦成一作
綠皺教成鸚鵡啄

紅甜試令鼓瑟應
無語目斷歸帆思未快
淹一作

費無隱丹室

碧雲雙引樹重重除却丹經戶牖空一徑綠陰三月雨
數聲啼鳥百花風年深不記栽桃客夜靜長留賣藥翁
幾度到來渾不語獨依秋色數歸鴻

賦雪洲

江上經年憶雪多長洲化作玉坡陀舊時射虎迷蹲石
薄莫歸漁認擁蓑河伯作宮龍獻壁相靈遺珮鳳停梭
鳧鷖容與江花發更待春來生水波

挽文山丞相

徒把金戈挽落暉，南冠無奈北風吹。
子房本為韓仇出，諸葛寧知漢祚移。
雲暗鼎湖龍去遠，月明華表鶴歸遲。
不須更上新亭望，大不如前灑淚時。

楊鐵崖洪武初不赴名詩子房本為

韓仇出諸葛寧知漢祚開全用此詩額聯列朝詩集所載一本云商山本為儲君出黃石終期孺子來豈鐵崖知襲用前人之非後乃自改耶鐵崖豔詩有全寫韓冬郎者英雄欺人不可以訓偶因此詩而并及之

贈道士

神室誰開自洞微，紫烟為戶玉為扉。
春容淡薄胎仙舞。

夜景虛明脉望飛繞指風雷龍睡醒滿囊雲錦虎馱歸
猶嫌長物煩聞見更上高臺一振衣

贈無塵道人

雲霧為衣月作裳天壇獨自禮虛皇龍收古劍沈秋水
鶴識神丹起夜光金井有聲惟墜露玉階無色乍凝霜
無端下界松風動又欲飄然上鳳凰

玉華山

何處清江擁玉華手題名榜寄仙家光凝石殿千年雪

影動銀河八月槎
藏藥寶函騰玉氣
說詩瑤席散天葩
奎章閣吏無能賦
得似新官蔡少霞

王庶山水

蜀人偏愛蜀江山
圖畫蒼茫咫尺間
駟馬橋邊車蓋合
百花潭上釣舟閑
亦知杜甫貧能賦
應歎揚雄老不還
花重錦官難得見
杜鵑啼處雨斑斑

畫虎圖贈真一先生

獵獵霜風木葉乾
月明曾過越王山
青龍久待蟠仙鼎

赤豹相呼守帝關終歲采芝芽阜曲豐年收穀杏林間
誰家稚子能為御長與桃椎共往還

滕王閣

城頭高閣插蒼茫百尺欄干背夕陽秋雨魚龍非故物
春風蛺蝶是何王帆檣急急來彭蠡車蓋童童出豫章
燈火夜歸湖上路隔離呼酒說干將

京師秋夜

風竹撼秋聲天寒夢不成如何今夜月偏照客窗明

王朋梅東涼亭圖延祐中奉勅所作草也

灤水東流紫霧開千門萬戶起崔嵬坡陀草色如波浪
長是鑿輿六月來

丁卯禮部考試次韻二首

憶昔坡頭接錦袍深堂披卷効微勞三年重得同清夜
宮燭風簾見月高

袍鵠鏘鏘赴曉闈分廬陳藝別東西憑教紅杏休開徹
早晚開闕蹋雪泥

東家四時詞四首

臨流洗硯見長身
白苧寬衣短葛巾
紈扇自題新得句
水亭分送倚闌人

摩挲舊賜碾龍團
紫磨無聲玉井寒
鸚鵡不知誰是客
學人言語近闌干

澄波千頃擁高鬟
手折芙蓉月下還
解憶高堂風露冷
袖衣先送碧雲山

賀雪宮門上表歸
貂裘猶帶六花飛
海南新送收香鳥

轉覺清寒入翠帷

贈傅與礪

水玉空青不易求
蘭苕翡翠擅清秋
才情豈是人間少
不到高唐夢未休

洪厓橋

澄江如練碧悠悠
一色蘆花覆遠洲
無盡春天歸鴈急
月明寒影不曾留

題張希孟凝雲石

海口不盈握隕然如委雲危岑集遠思虛竇棲微熏天
高泰華斷日出香爐分几研襲清潤文章互網緼潛雷
起神谷震驚天上聞亟視恐無及化為九龍文

朱秀之杞菊軒

高軒何所植杞菊交根枝紫實既秋熟黃花亦晚滋嘉
名信共愛何以療予飢此邦號富庶士賈志懷資蕭條
山石間誰復見惇嫠遺脫兼并餘推剝無完肌縱彼百
畝受豈得安耘籽種此項步內庶無征奪思採擷勿違

節烹芼貴有宜三咽可千歲逍遙奉天隨

某游吳中因省墓山間頗

見田野有可念因贊高軒之樂而及之庶觀風者之有采而知之者

送豫章熊太古兼寄蘇伯修參政

豫章有家學禮樂不見叔為養不擇祿淒涼向炎州攬結
桂樹枝誰為玉雪謀十年一再見我老君白頭古劍光陸
離繫以珊瑚鉤激昂文史間未愧班馬儔蘇君天下士定價
琳琅球江漢方渺然為我觀素秋長吟以相送明月在高樓

李伯時九歌圖

太乙神君號東皇玉質要妙舍和陽生生炁始通微茫
綿綿蒸空神中央浮英上羅文天章覆冒下滿谷與阮
旁塞無間靈無方靈來乘柔往乘剛湘君夫人鎮相望
清溫靜好非淫傷司命元老元氣昌手執藜杖色老蒼
歷劫壽命不可量少君之壽同其長離無異體合有常
出入萬化終不亡晶明發晨上搏桑海天赫赫真金芒
質鍊不滅長垂光河源混混流湯湯伯也坐視無迎將
千古萬古何堂堂彼幽為厲為強梁朝狸莫豹方鵠張

精魂熠耀志意荒招之不反巫無良屈生作歌沈九湘
世人傳聲罕尋詳祝融仙子調玄黃九神出圖百怪藏
不信請視虞公章

送呂教授還臨川

并序

古者仕不出其國五十里百里而已入仕王朝才
千里而近無父兄妻子墳墓屋宅之別而有祿食
之羨車服之華焉豈不便適人情乎哉今國家奄
有宇宙仕者視南交朔易若東西家然則彼出入

驅馳不越乎州閭黨術之間者不亦隘乎呂君仲

謙世居臨川之南山木鬱茂田毛易長仰事其親

俯育其妻子何嘗有意於遠游哉一旦用薦書得

為遼東學官隨牒以行且萬里冬裘不足以禦寒

蔬腸不勝其恒肉雖志氣不變然情能無少違乎

僕願留之館中而不可歸其宜也故作詩以送之

黃金作臺留好客好客不留秋月白東風吹雪滿衣襟

却賦長歌送行客

一作色

遼東之山醫巫閭六月五月雪

不除昨朝遣使降香去五尺冰上行飛車一作飛知君

行車

江上慣舟楫快馬如龍亦徒設東取來時一卷一作書

還向江波對一作弄明月我本蜀人隨水來結屋與子相

鄰隈白髮京塵不歸去臨風相送興一作空悠哉

城南春曉圖

天台先生有山癖卧起無山朝不食幾年騎馬聽朝雞
磊砢諸峰拄胸臆陳生受意不受辭竟拈秃筆為掃之
既安樓觀對奇石復著梁棧橫清漪游吾舊游釣吾釣

隔林彷彿聞幽鳥瓊臺何處無桃花此是城南莫春曉
夜來天子傳詔呼先生直上鑿坡趨盤盤迴復一萬里
無限好山并好水如從島上見陳生盡寫歸來畫堂裏

金馬圖

人負金馬
睡於馬上

賈胡自騎千金馬解囊小憩荒城下平原無樹起秋風
夢到陰山雪橫野太平疆宇大無外外戶連城無閉夜
不然安有獨行人懷寶安眠如畫者

刷馬歌

天馬之來大宛國漢帝心馳渥洼域貳師兵甲費如山
毛骨權竒不多得世祖開基肇太平昔日大宛俱拱北
如雲之馬西北來飛控驚塵遍南陌豢養年深生息蕃
即今詔刷無遺迹青絲絡頭千萬輩戢戢駢頭死槽櫪
一程瘡毒一程愁比到燕山肥者瘠吾觀天廐十二閑
五花成隊春斑斑監官喂養盛芻豆年年騎去居庸關
聖朝誰信多盜賊却慮騎氣藏凶奸駑駘盡從天上去
驂騑豈得留人間漢人南人窘徒步道路相從俱厚顏

我今已是倦游者東家蹇驢何必借布鞵青鞵取次行
正喜不遭官長罵鄉里健兒弓弩手詔許征鞍常穩跨
嶺南烽火亂者誰何事至今猶梗化君不見漢文皇帝
承平時千里之馬將安之又不見項王一騎烏江渡到
頭不識陰陵路

次韻葉賓月山居十首 錄四

冰泮溪流碧雲生島嶼紅輕陰殘夢裏遠樹亂愁中鷗
外兼晴絮鶯邊共晚風地偏山氣近霏靄濕房櫳

露冷天光碧溪澄夜影圓水花含窈窕山吹縱清絲為
覓洪崖侶重尋赤壁船翻愁孤鶴外迴互萬山連
綠瑣依依松潤緜簾亂蘚斑吹笙花下散飛燕雨中還有
客歸謀酒無言卧看山春禽忽相喚深樹兩闕闕
風日宜芳歲烟霞樂燕居坐深閑看弈燭冷靜修書臘
醞紅生玉春盤綠間蔬但須門有客不問食無魚

酬崔御史送熊掌

熊掌來東國分甘到老夫鸞刀寒斷節翠釜煖柔膚兔

脫中山醢魚藏丙穴腴藜腸渾未厭玉食恐時須

代祀西嶽答袁伯長王繼學馬伯庸三學士二首

紫禁沈沈曙色低奉祠羣使已班齊承恩歸院迷烟樹
乘傳開闕踏雪泥蹠躐共憐騎苑馬逶迤不若聽朝雞
山川有事寧辭遠只尺成都是國西

棧道年年葺舊摧已將平易履崔嵬經行關輔圖中見
夢戀鄉山馬上來諸葛精神明似日相如情思冷於灰

重思親舍猶南國願託江波去却回

此題表伯長首唱而諸君和之足以

見一時館閣諸臣風采表虞王馬方駕竝驅此正有元極盛之時矣集中所載諸公倡和之什雖不必盡工而各存之以備參考如此題及上京雜咏等類是也

張道士蜀山圖

碧玉參天是蜀山舊曾飛度歷孱顏松風上接空歌外
蘿月長懸合景間試劍丹崖秋隼疾濯纓清澗夜龍閑
君家虛靖歸來日冉冉蓬壺為憶還

從兄德觀父與集同出榮州府君宋亡隱居不

仕而歿集來吳門省墓從外親臨叩韓氏得兄
遺蹟有云我因國破家何在君為脣亡齒亦寒
不知為誰作也撫誦不覺流涕因足成一章并
發其幽潛之意云

我因國破家何在君為脣亡齒亦寒南渡豈殊唐社稷
中原不改漢衣冠温温雨氣吞殘壁泯泯江潮擊壞欄
萬里不歸天浩蕩滄波隨意把漁竿

興慶宮朝退次韻袁伯長見貽是日上加尊號

禮成告謝集即東出奉祠齋宮

翠蓋重重寶扇斜從官穿柳散慈鴉過宮路遠紆天步
上壽杯深閣雨花玉貫兩虹通象錦衣成五綵鍊雲霞
奉祠東出蓬萊道春水鳧鷖踏漢槎

和李秋谷平章小車詩

雪晴宮草隱晴沙相國朝天試帝車班馬晝移溫室樹
鳴鸞晨度掖垣花寧惟每命賢俱載趣駕頻煩使至家
此日龍門誰執御擁經正履侍金華

游岡子原呈王學士

岡子原頭春色濃
小車晨出看東風
雨餘林潤人鳥好
日煖沙平我馬同
西引峰巒來座上
東瞻樓閣起天中
詠歸莫作息息晚
僮解相逢擊壤翁

次韻寄元復初

黃粱夢覺人千里
白壁歸來月一缸
尊酒幾時忘北海
東書無路到東窗
卧龍宛宛冰生壑
飛鶴翩翩雪灑江
無限心期總寥落
秋風烟樹引歸幢

羅若川畫松

莫春多雨晝冥冥
羅生畫松當素屏
老蛟化為劍氣黑
白鶴下啄苔痕青
傳來日莫自篝火
夢入幽巖尋茯苓
不遇胡僧露雙脚
石函自了讀殘經

送胡士恭

十年京國擅才華
宰相頻招載後車
太液蒼涼黃鵠羽
玄都爛熳碧桃花
三清風露仙人館
萬里烟塵野老家
拂拭舊題如隔世
華星明漢望歸槎

舟泊安和阮宅次黃志高韻

十月東歸下石瀧
羣公促膝共輕艘
蕭雲故宅多喬木
阮籍清樽對暮江
方駕肯來良馬五
尺書先寄鯉魚雙
欲求深隱何山曲
雪竹霜筠共一窗

賦文子方家篔簹亭竹影

數箇篔簹一小亭
南窗承日印寒青
水晶簾裏珊瑚樹
雲母屏間翡翠翎
却愛微風動蕭瑟
翻疑薄暮倚娉婷
憑君縱有鸞溪絹
莫與空花結定形

舟次湖口

江沙如雪水無聲
舟倚蒹葭鴈不驚
霜氣隔篷纔數尺
斗杓插地已三更
拋書枕畔憐兒子
看劍燈前慨友生
尚有乘桴無限意
催人搖櫓轉江城

聶空山畫扇

客來山雨鳴
磬客去山翁醉
眠花外晴雲靄
靄竹邊秋
月娟娟

青山白雲圖

獨向山中訪隱君行窮千澗水
法法仙家更在空青外
只許人間禮白雲

寄澄湛堂法師

月中桂子落巖阿想有林間閱具多
持足地神衣拂石
獻珠天女鞞凌波香因結願留龍受水為烹茶
喚虎馱
寄到竹西無孔笛吹成動地太平歌

送戴真人歸越


戴先生日飲五斗醉不得再飲一石
不肯眠昨從桃源

來兩袖攜風烟長安道上小兒女拍手攔道呼神仙馬
如游龍花如雨蹴踏春秋作朝莫東方不作窓間戲上
帝還令海邊去海邊玉虹夜不收貝闕珠宮皆蛟蚪芝
田玉樹久相待天上老仙那肯留戴先生鑑湖之水三
千丈不可以鑑可以釀明朝亦脫錦袍去與汝酣歌釣
船上

田汝成西湖志餘云虞伯生際遇文宗置奎章閣為
學士順帝為明宗子文宗忌之遠竄海南詔書有曰
明宗在北之時自以為非其子伯生筆也文宗晏駕
寧宗立八月崩國人迎順帝立之伯生時在江西詔

以皮繩縛腰馬尾縫眼夾兩馬間逮捕至大都嫉之者為十七字詩曰自謂非其子如今作天子傳語老蠻子請死至則以文宗親改詔藁呈順帝覽之曰此我家事豈由爾書生耶遂得釋兩目由是喪明按元史伯生在文宗朝中丞趙世安嘗以集病目就醫為請幼君殂大臣用至大故事召諸老臣赴上都議政集在召列馬祖帝使人告之曰御史有言乃謝病歸無馬尾縫眼之事裨史流傳恐未足以徵信也

元詩選初集卷二十六



總校官候補中書 臣 吳紹濬

校對官編修 臣 馬啟泰

鑒錄監生 臣 呂學文